



Inatsisartut

*Aningaasaqarnermut Ataatsimiititaliaq
Finansudvalget*

Ulloq/Dato: 5. maj 2011
J.nr.: 01.31.06/11-00531

Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/11-00531 pillugu pingasunngornermi ulloq 4. maj 2011-mi aalajangiineranik Naalakkersuisunut ilisimatitsineq.

Imarsiornermik ilinniartitaanerup Paamiunit nuunneqarnissaa

Naalakkersuisut **inassutigaa**,

- Konto pingaarnermi 40.91.14-imi, Kalaallit Nunaanni Imarsiornermik Ilinniartarfimmumut tunngasumi, aningaasaliissutit ukiumut aningaasanut inatsiseqarfiusumut 2011-mut 1,2 mio. kr.-inik amerlineqassasut aamma
- Konto pingaarnermi 40.01.08-mi, Ilinniartitaanerup pilersaarummut kiisalu ilinniartitaanerup immikkut ittumik suliniuteqarfigineqarneranut tunngasumi, aningaasaliissutit ukiumut aningaasanut inatsiseqarfiusumut 2011-mut 1,2 mio. kr.-inik ikilineqassasut.

Aningaasaqarnermut Ataatsimiititaliap oqaaseqaatai

Umiarsuit naalagaattut ilinniartitaanerup Danmarkimut nuunneqarnissaata aallarnisarneqarnissaa 2010-mi aningaasanut inatsisissatut siunnersuutip akuersissutigineqarneranut atatillugu isumaliutigineqarpoq, tamatumali kingorna suleqatigiissitap ilaatigut KNAPK-mit, RAL-imit, GA-mit Royal Greenlandimillu ilaasortaaffigineqartup ilinniartitaanerup Paamiunit Nuummumut Sisimiunulluunniit nuunneqarluni nunatsinni ingerlatiinnarneqarnissaa kaammattuutigaa. Umiarsuit naalagaattut ilinniartitaaneq aammalu imarsiornermik ilinniartarfimmi tunngaviummik ilinniartitaaneq ataatsimut inissisimajunnaarlutik avissaartinneqassasut suleqatigiissitap ilanngullugu kaammattuutigaa, tassa ilinniartitaanerit taakku marluk imminnut iluaqutigineq ajormata.

Tamanna tunngavigalugu Kalaallit Nunaanni Imarsiornermik Ilinniartarfimmumut Paamiuniittumut aningaasaliissutit amerlineqarnissaat Naalakkersuisut suliami matumani qinnutigaat, tamatumani siunertarineqarluni umiarsuit naalagaattut ilinniartitaanerup nangingineqarnerani 2011-mi aningaasartuutit matuneqarnissaat. Tamatuma kingorna umiarsuit naalagaattut ilinniartitaanerup 1. august 2011-mi aallarteqqinneqarnissaa naatsorsuutigineqarpoq.

Suliami aalajangiitinnani makku Naalakkersuisunut apeqqutiginissaat ataatsimiititaliamit kissaatigineqarpoq:

1. Pisortatigoortumik nalunaarsukkat naapertorlugit assartuutit 300 BT-it ataallugit angissusillit 83-iusut nassuiaatip kalaallisuuani quppernermi 4-mi paasissutissiissutigineqarpoq. Kisitsilli taanna annaagaasimassasoq ilimanartoq suleqatigiissitami nalilerneqarpoq taarsiullugulu 22-inik amerlassusilerneqarlutik. Angallatit taamaattut 22-iunut qanoq tagginneqarpat?
2. Umiarsuit naalagaannik siunissami pisariaqartitsinissap naatsorsornerani sinerissap qanittuani aalisariutinik naleqqussaanerup sunniutissai ilanngunneqarsimannigitsut nassuiaatip kalaallisoortaani quppernermi 5-imi paasissutissiissutigineqarpoq.

Sinerissap qanittuani aalisariutit qassinik ikileriarnissaat pillugu Naalakkersuisut aalajangersimasumik naatsorsuutigisaqarpat naatsorsuutigisallu taakku umiarsuit naalagaannik siunissami pisariaqartitsinerup missiliorneqarneranut sunniuteqartussatut isigineqarpat?

3. Nassuiaatip kalaallisuuani quppernermi 7-imi ima paasissutissiisoqarpoq ”*Qitiusumik oqartussaasunit aatsitassarsiornikkut uuliasiornikkullu piffissami aggersumi naatsorsuutigisinnaasat pillugit oqariartuutigineqartartut isumannaatsumik isertitaqaataaffiulernissaannik, taamatullu aalisarnermik inuussutissarsiuteqarnerup inuussutissarsiutitigut appasinnerusutut isigineqarneruneranik.*”. Ilinniartitaanerit Sisimiunut Nuummullu nuunnerisigut tamanna allannguuteqarnaviarunanngilaq aammalu allassimasut ataatigut titakkat qanorpiaq isumaqartinneqarpat?
4. Aalisarnerup siunissaa nalorninartutut isigineqarmat imarsiornermik ilinniarnissaq inuusuttut amerlasuut toqqarnej ajoraat nassuiaatip kalaallisuuani quppernermi 7-imi paasissutissiissutigineqarpoq. Tamanna Naalakkersuisut itisilersinnaavaat?
5. Tunngaviusumik ilinniartitaanerup Paamiuni iluatitsiviunnginneranut ilinniartut inaasa pitsaannginnerat ullutsinnullu naleqqukkunnaavissimanagerat ilaatigut pissutaasoq nassuiaatip kalaallisuuani quppernermi 9-mi paasissutissiissutigineqarpoq. Ilinniartut inaannik iluarsaneq aaqqiissutaasinnaasutut isumaliutigineqarsimava, tamannalu qanoq akeqassava?
6. Ilisimasat malillugit Nuummi Sisimiunilu ilinniartut inaat assut atorfissaqartinneqarput. Ilinniarfimmi ilinniartut Nuummi Sisimiunilu ilinniartut inaanni inissanik neqeroorfigineqarnissaannut periarfissat qanoq ittut naatsorsuutigineqarpat?
7. Illoqarfiit pineqartut marluk arlaanni illunik umiarsuit naalagaannik ilinniartitsinissamat atussallugit naleqquttunik peqarpa? Illumik pioreersumik allanngortiterinikkut nutaamilluunniit sananikkut illup pisariaqartinneqartup pissarsiarinissaa qanoq akeqassava?
8. Ilinniartitsisut Fanømi imarsiornermik ilinniarfimmeersut nakorsaataasivik pillugu pinngitsoorani pikkorissartitsinerni ilinniartitsisussatut ullumikkut Paamiuliartinneqartartut nassuiaatip kalaallisuuani quppernermi 10-mi paasissutissiissutigineqarpoq. Ilinniartitaaneq Nuummullu nuunneqassappat suliasaq taanna Nuummi PI-mit isumagineqarsinnaasasoq naatsorsuutigineqarpoq. Ilinniartitsinerup taassuma isumaginissaanut PI-mi ilinniartitsisunik Paamiuliartitsisinnaaneq isumaliutigineqarsimava?
9. Suliaq Kommuneqarfik Sermersuumit isummerfigineqarpa, taamaassimappallu qanoq isummerfigineqarpa?
10. Isummernissamat tunngavissiami inassuteqaatit sisamat, Naalakkersuisut aalajangiinissaannut atugassatut taamaallaat naatsorsuutigineqartut, tunngavigalugit Naalakkersuisut qanoq aalajangiippat?
11. Ataatsimiititaliap suliamik suliarinninneranut pingaaruteqarsinnaasunik allanik Naalakkersuisut paasissutissiisinnaappat?

Aningaasaqarnermut Ataatsimiititaliap aalajangiinera

Apeqqutinut siuliani allassimasunut Naalakkersuisut akissuteqarnissaasa utaqqineqarnissaa siunertaralugu Naalakkersuisut inassuteqaataannut isummernissani siuliani allassimasutut paasinnilluni Aningaasaqarnermut Ataatsimiititaliap **kinguartippaa**. Naalakkersuisut akissutaat kalaallisut danskisullu nassiunneqassasoq qinnutigineqarpoq taassumalu assilinera elektroniskimik uunga nassiuteqquneqarluni: neh@ina.gl.

Aningaasaqarnermut Ataatsimiititaliap sinnerlugu

Olga P. Berthelsen

Aningaasaqarnermut Ataatsimiititaliap siulittaasua